



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

*Sumáriu Kazu*  
*Tribunál Distritál*  
*Suai Jullu 2016*

**A. Sumáriu prosesu julgamentu kazu iha Tribunál Distritál Suai - Períodu Jullu 2016**

**1. Totál kazu ne'ebé JSMP monitoriza : 26**

<b>Tipu Kazu</b>	<b>Númeru</b>
Artigu 145 Kódigu Penál (KP) no artigu 35 Lei Kontra Violénsia Doméstika(LKVD) - Ofensa ba integridade fizika simples	12
Artigu 145 - Ofensa ba integridade fizika simples	3
Artigu 225 - La halo tuir obrigasaun alimentár	1
Artigu 316 - Kontrabandu	1
Artigu 157 & 258 - Ameasa	1
Artigu 172 - Violasaun Seksuál	3
Artigu 303 - Falsifikasaun ba Dokomentus	1
Artigu 145 - Ofensa ba integridade fizika simples	4
<b>Totál</b>	<b>26</b>

**2. Totál desizaun ne'ebé JSMP monitoriza : 13**

<b>Tipu desizaun</b>	<b>Númeru</b>
Suspensaun ba pena prizaun tuir Artigu 68 husi KP	7
Pena multa tuir Artigu 67 husi KP	3
Omologu	2
Absolve	1
<b>Totál</b>	<b>13</b>

**3. Total kazu sira ne'ebé adia tuir JSMP nia monitorizasaun : 13**

<b>Razaun adiamentu</b>	<b>Númeru</b>
La notifika	5
Sei kontinua prosesu	3
Lezada ho arguidu la marka prezensa	5
<b>Totál</b>	<b>13</b>

**4. Total kazu sira ne'ebé sei kontinua prosesu tuir JSMP nia monitorizasaun : 13**

**B. Deskripsaun sumáriu ba desizaun kazu sira hosi fulan Jullu 2016**

## **1. Krime ofensa ba integridade fízika simples ho natureza violénsia doméstika**

Nú. Prosesu : 184/PEN/16/TDS  
Kompozisaun Tribunál : Singulár  
Juis : Dr. Argentino Luisa Nunes  
Ministériu Públiku : Dr. Bartolomeo de Araujo  
Defeza : Dr. Angelo Barreto (advogadu Privadu)  
Tipu desizaun : Pena prizaun fulan 6 suspende ba tinan 1

Iha 12 Jullu 2016, Tribunál Distritál Suai prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu CAT hasoru nia feen, iha Distritu Covalima.

Ministériu Públiku akuza katak, iha 15 Outubru 2016, arguidu tebe dala 1 kona iha lezada nia matan fukun no rezulta moras no kanek.

Ministériu Públiku akuza, arguidu kontra artigu 145 KP kona-ba ofensa ba integridade fízika simples konjuga ho artigu 2, 3, no 35 (b) LKVD.

Iha prosesu julgamentu, arguidu uja direitu nonok. Enkuantu lezada kontinua reforsa akuzasaun Ministériu Públiku maibe deklara katak, nia perdua ona arguidu.

Iha alegasaun finál, Ministériu Públiku husu ba Tribunál atu kondena arguidu ho pena prizaun fulan 6 no suspende ba tinan 1. Ministériu Públiku husu pena ne'e atu halo prevensaun jerál ba arguidu atu la repete tan ninia hahalok ne'e iha futuro. Entretantu, Defeza husu ba Tribunál atu aplika pena multa ba arguidu.

Depoisde avalia faktus provadu sira durante julgamentu, Tribunál konklui no kondena arguidu ho pena prizaun fulan 6 suspende ba tinan 1, inklui selu kustu judisiál US\$50.00.-

## **2. Krime ofensa ba integridade fízika simples ho natureza violénsia doméstika**

Nú. Prosesu : 172/PEN/15/TDS  
Kompozisaun Tribunál : Singulár  
Juis : Dr. Argentino Luisa Nunes  
Ministériu Públiku : Dr. Bartolomeo de Araujo  
Defeza : Dr. Angelo Barreto (advogadu Privadu)  
Tipu desizaun : Pena prizaun fulan 6 suspende ba tinan 1

Iha 12 Jullu 2016, Tribunál Distritál Suai prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu MAP hasoru nia feen, iha Distritu Covalima.

Ministériu Públiku akuza katak, iha 03 Marsu 2015, arguidu tuku dala 1 iha lezada nia matan fukun loos no rezulta lezada sofre moras no bubu boot iha lezada nia matan fukun loos.

Ministériu Públiku akuza, arguidu kontra artigu 145 KP kona-ba ofensa ba integridade fízika simples konjuga ho artigu 2, 3 no 35 (b) LKVD.

Iha prosesu julgamentu, arguidu konfesa totalmente ba faktus iha akuzasaun Ministériu Públiku, arguidu rekoñese ninia salan no deklarata katak, aktus ne'ebé nia komete hasoru lezada hanesan aktus espontánea. Aleinde ne'e, lezada kontinua reforsa akuzasaun Ministériu Públiku no deklarata katak, nia perdua ona arguidu no to'o agora sira moris hamutuk hanesan feen ho laen.

Iha alegasaun finál, Ministériu Públiku husu ba Tribunál atu kondena arguidu ho pena prizaun fulan 6 no suspende ba tinan 1 ba arguidu atu la repete ninia hahalok ne'e iha futuru. Iha parte seluk, Defeza husu ba Tribunál atu aplika pena ne'ebé justu no adekuaudu ba arguidu.

Depoizde avalia faktus sira durante julgamentu, Tribunál konklui hodi kondena arguidu ho pena prizaun fulan 6 suspende ba tinan 1, inklui selu kustu judisiál US\$10.00.-

### **3. Krime ofensa ba integridade fízika simples ho natureza violénsia doméstika**

Nú. Prosesu	: 150/PEN/16/TDS
Kompozisaun Tribunál	: Singulár
Juis	: Dr. Samuel da Costa Pacheko
Ministériu Públiku	: Dr. Bartolomeo de Araujo
Defeza	: Dr. Albino de Jesus Pereira
Tipu desizaun	: Pena prizaun fulan 6 suspende ba tinan 1

Iha 14 Jullu 2016, Tribunál Distritál Suai prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DO hasoru nia feen, iha Distritu Manufahi.

Ministériu Públiku akuza katak, iha 03 Fevereiru 2016, arguidu lori sabit ka tudik kleuk nia ulun baku dala 1, iha lezada nia ulun no rezulta kanek no ran sai.

Ministériu Públiku akuza, arguidu kontra artigu 145 KP kona-ba ofensa ba integridade fízika simples konjuga ho artigu 2, 3 no 35 (b) LKVD.

Iha prosesu julgamentu, arguidu konfesa totalmente ba akuzasaun hosi Ministériu Públiku no deklarata katak, nia tuku duni lezada ho katana (sabit) nia kain no rezulta lezada kanek no ran sai. Aleinde ne'e, lezada kontinua reforsa akuzasaun Ministériu Públiku maibe deklarata katak, nia perdua ona arguidu tanba arguidu husu ona diskulpa ba nia no lori lezada ba halo tratamentu nia kanek iha klinika ne'ebé besik.

Iha alegasaun finál, Ministériu Públiku husu ba Tribunál atu kondena arguidu ho pena prizaun fulan 6 no suspende ba tinan 1. Defeza husu ba Tribunál atu aplika pena admoestasaun ba arguidu tanba arguidu arrepende ona ninia hahalok no husu diskulpa ba lezada no lori lezada ba halo tratamentu iha klinika ne'ebé besik.

Tribunál konklui prosesu ne'e no kondena arguidu ho pena prizaun fulan 6 suspende ba tinan 1, inklui selu kustu judisiál US\$20.00.-

#### **4. Krime ameasa**

Nú. Prosesu : 130/PEN/15/TDS  
Kompozisaun Tribunál : Singulár  
Juis : Dr. Argentino Luisa Nunes  
Ministériu Públiku : Dr. Bartolomeo de Araujo  
Defeza : Dr. Gaspar Fereira Gusmão (advogadu provadu)  
Tipu desizaun : Absolve

Iha 19 Jullu 2016, Tribunál Distritál Suai prezide leitura sentesa ba krime ameasa ne'ebé envolve arguidu BdA hasoru lezada RM, iha Distritu Covalima.

Ministériu Públiku akuza katak, iha 10 Agostu 2015, arguidu kaer katana ameasa lezada no arguidu mós hadau fali ninia rai hosi lezada ne'ebé antes ne'e entrega ba lezada hodi halo to'os no kuda aiteka no ai-horis sira seluk tan.

Ministériu Públiku akuza, arguidu kontra artigu 157 KP kona-ba ameasa, ne'ebé sei hetan pena prizaun to'o tinan 2 ka multa.

Iha prosesu julgamentu arguidu nega akuzasaun hotu hosi Ministériu Públiku, no deklara katak nia la lori katana ameasa lezada no la taa estraga lezada nia aiteka no ai-horis sira seluk iha momentu ne'e.

Lezada kontinua deklara haforsa akuzasaun Ministériu Públiku maibe nia subliña katak, nia laharee ho matan arguidu mak taa ai-teka no lere ai-sira seluk ne'e, maibe nia rona de'it hosi ema seluk mak konta tutan ba nia hodi nia ba hato'o keixa iha polísia. Lezada mós deklara katak antes akontesementu ne'e, iha 10 Agostu 2015 dadersan nia haree arguidu kaer hela katana maibe la ameasa nia.

Iha alegasaun final, Ministériu Públiku husu ba Tribunál atu absolve arguidu hosi prosesu ne'e tanba la preense rekezitu ba krime ameasa. Aleinde ne'e Defeza konkorda ho alegasaun hosi Ministériu Públiku no husu Tribunál atu absolve arguidu.

Depois avalia faktus sira durante julgamentu, Tribunál konklui no absolve arguidu hosi prosesu ne'e.

#### **5. Krime kontrabandu**

Nú. Prosesu : 192/PEN/16/TDS  
Kompozisaun Tribunál : Singulár  
Juis : Dr. Samuel da Costa Pacheko  
Ministériu Públiku : Dr. Bartolomeo de Araujo  
Defeza : Dr. Albino de Jesus Pereira  
Tipu desizaun : Pena multa US\$ 360.00.-

Iha 19 Jullu 2016, Tribunál Distritál Suai prezide leitura sentensa ba krime kontrabandu ne'ebé envolve arguidu JdS no SP hasoru Estadu RDTL, iha Distritu Covalima.

Ministériu Públiku akuza katak, iha 19 Janeiru 2016, arguidu sira sosa sasan ilegal iha Indonezia hanesan kilat anin (manu) hamutuk loloon 15 no ropa karon 2 (karon boot 1, no karon kiik 1) ne'ebé kuandu konverte nia montante ba osan kuaze hamutuk US\$1,150.00.

Ministériu Públiku akuza arguidu kontra artigu 316 KP kona-ba krime kontrabandu ne'ebé sei hetan pena prizaun tinan 2 too tinan 6 ka multa.

Iha prosesu julgamentu, arguidu sira konfesa totalmente ba akuzasaun hosi Ministériu Públiku. Aleinde ne'e, arguidu sira deklarara katak sira arrepende ona sira nia hahalok tanba hatama sasan ilegalmente hosi fonteira Salele Suai. Maibe arguidu sira mós deklarara katak sira pruntu atu selu multa ka taxa ba Estadu.

Iha alegasaun finál, Ministériu Públiku husu ba Tribunál atu kondena arguidu sira ho pena multa no kada ema ida sei selu US\$50.00. Defeza husu ba Tribunál atu aplika pena ne'ebé justu ba arguidu sira.

Depoizde avalia faktus sira durante julgamentu, Tribunál konklui prosesu ne'e no kondena arguidu sira ho pena multa kada arguidu sei selu US\$360.00, ne'ebé kada loron sei selu US\$2.00 durante loron 90, no arguidu ida-idak sei selu mós kustu judisiál US\$20.00.-

## **6. Krime ofensa ba integridade fizika simples**

Nú. Prosesu	: 211/PEN/16/TDS
Kompozisaun Tribunál	: Singulár
Juis	: Dr. Samuel da Costa Pacheko
Ministériu Públiku	: Dr. Bartolomeo de Araujo
Defeza	: Dr. Manuel Goncalves
Tipu desizaun	: Pena prizaun fulan 3 suspende ba tinan 1

Iha 20 Jullu 2016, Tribunál Distritál Suai prezide leitura sentensa ba krime ofensa ba integridade fizika simples ne'ebé envolve arguida OdC hasoru SGdC, iha Distritu Covalima.

Ministériu Públiku akuza katak, iha 14 Marsu 2016, arguida rakut lezada nia fuuk, lees no buti iha lezada nia kakorok no tata iha lezada nia liman loos. Aktu hirak ne'e rezulta lezada sofre kanek iha liman no moras iha kakorok.

Ministériu Públiku akuza, arguida kontra artigu 145 KP kona-ba ofensa ba integridade fizika simples ne'ebé, sei hetan pena prizaun too tinan 3 ka multa.

Iha prosesu julgamentu, arguida konfesa totalmente ba akuzasaun hosi Ministériu Públiku. Aleinde ne'e, lezada mós reforsa akuzasaun hosi Ministériu Públiku katak, arguida mak rakut nia fuuk, lees no buti nia kakorok no tata iha nia liman too kanek no halo nia sente moras.

Iha alegasaun finál, Ministériu Públiku husu ba Tribunál atu kondena arguida ho pena prizaun fulan 3 suspende ba tinan 1. Defeza husu ba Tribunál atu aplika pena admoestasaun ba arguida.

Depois avalia faktus sira durante julgamentu, Tribunál a favor ba alegasaun Ministériu Públiku nian no kondena arguida ho pena prizaun fulan 3 suspende ba tinan 1, no selu kustu judisiál US\$10.00.-

## **7. Krime ofensa ba integridade física simples ho natureza violénsia doméstika**

Nú. Prosesu : 144/PEN/15/TDS  
Kompozisaun Tribunál : Singulár  
Juis : Dr. Constancio Barrros Basmerly  
Ministériu Públiku : Dr. Bartolomeo de Araujo  
Defeza : Dr. João Cortereal (advogadu Privadu)  
Tipu desizaun : Pena prizaun tinan 2 suspende tinan 3

Iha 20 Jullu 2016, Tribunál Distritál Suai prezide leitura sentesa ba krime ofensa ba integridade física simples ho natureza violénsia doméstika ne'ebé envolve arguidu BFB hasoru nia feen, iha Distritu Bobonaro.

Ministériu Públiku akuza katak, iha 10 Fevereiru 2016, arguidu tuku dala barak iha lezada nia ulun, tebe dala 2 iha kotuk laran no dala 1 iha nia hirus matan. Arguidu mós lori aisar kesak baku lezada nia kabas dala 4. Aktu hirak ne'e rezulta lezada sofre moras iha kotuk no bubu iha lezada nia ulun.

Ministériu Públiku akuza, arguidu kontra artigu 145 KP kona-ba ofensa ba integridade física simples konjuga ho artigu 2, 3 no 35 (b) LKVD.

Iha prosesu julgamentu, arguidu konfesa totalmente ba akuzasaun hosi Ministériu Públiku katak, nia tuku dala barak duni iha lezada nia ulun, tebe dala 1 iha nia kotuk laran no lezada nia hirus matan no baku mós lezada ho aisar iha lezada nia kabas. Aleinde ne'e, lezada mós kontinua reforsa akuzasaun Ministériu Públiku maibe deklarara katak, nia perdua ona arguidu.

Iha alegasaun finál, Ministériu Públiku husu ba Tribunál atu kondena arguidu ho pena prizaun tinan 2 no suspende ba tinan 3. Ministériu Públiku husu pena ne'e atu halo prevensaun jerál ba arguidu atu la repete ninia hahalok ne'e iha futuro. Defeza husu ba Tribunál atu aplika pena ne'ebé justu no kmaan ba arguidu.

Depoisde avalia faktus sira durante julgamentu, Tribunál konklui no kondena arguidu ho pena prizaun tinan 2 suspende ba tinan 3, inklui selu kustu judisiál US\$30.00.-

## **8. Krime ofensa ba integridade física simples**

Nú. Prosesu : 169/PEN/16/TDS  
Kompozisaun Tribunál : Singulár  
Juis : Dr. Samuel da Costa Pacheko  
Ministériu Públiku : Dr. Bartolomeo de Araujo  
Defeza : Dr. Manuel Amaral  
Tipu desizaun : Omologa dezisténsia keixa

Iha 20 Jullu 2016, Tribunál Distritál Suai prezide prosesu konsiliaun ba krime ofensa ba integridade fizika simples ne'ebé envolve arguidu JC hasoru EM, iha Distritu Covalima.

Iha prosesu konsiliaun ne'e lezadu hakarak deziste nia keixa hasoru arguidu tanba arguidu arrepende ona ninia hahalok no husu ona diskulpa ba lezadu no lezadu rasik perdua ona arguidu.

Ministériu Públiku akuza katak, iha 29 Marsu 2015, arguidu tuku dala 4 iha lezadu nia kotuk no tuku dala 3 iha tilun-hun sorin loos, no rezulta lezadu sofre moras no bubu iha tilun-hun.

Ministériu Públiku akuza arguidu kontra artigu 145 kona-ba ofensa ba integridade fizika simples ne'ebé ho moldura penál entre tinan 3 prizaun ka multa.

Bazeia ba pedidu dezisténsia keixa hosi lezadu no akordu ne'ebé sira prodús, iha alegasaun finál Ministériu Públiku no Defeza husu ba Tribunál atu omologa prosesu ne'e.

Depoisde avalia akordu hosi parte sira no dezistensia keixa hosi lezadu, Tribunál konklui prosesu ne'e no omologa pedidu dezisténsia ne'e.

### **9. Krime ofensa ba integridade fízika simples ho natureza violénsia doméstika**

Nú. Prosesu	: 190/PEN/15/TDS
Kompozisaun Tribunál	: Singulár
Juis	: Dr. Samuel da Costa Pacheko
Ministériu Públiku	: Dr. Bartolomeo de Araujo
Defeza	: Dr. Albino de Jesus Pereira
Tipu desizaun	: Pena prizaun fulan 6 suspende ba tinan 1

Iha 21 Jullu 2016, Tribunál Distritál Suai prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu JA hasoru nia-oan (AdR), iha Distritu Covalima.

Ministériu Públiku akuza katak, iha 16 Dezembru 2015, arguidu lori martelu nia kain baku dala 1 iha lezadu nia ulun no lezadu nia ain-tuur no rezulta lezadu sofre moras no bubu iha nia ulun no ain tuur.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2, 3 no 35 (b) LKVD.

Iha prosesu julgamentu, arguidu konfesa totalmente ba faktus sira iha akuzasaun Ministériu Públiku no deklara katak loos duni nia baku lezadu ho martelu nia kain dalarua, ida-uluk kona iha ulun, no 1 seluk kona iha lezadu nia ain tuur. Arguidu deklara katak, nia arrepende ona ninia hahalok no husu ona diskulpa ba lezadu. Aleinde ne'e, lezadu kontinua mantein faktu sira iha akuzasaun, maibe deklara katak nia perdua ona arguidu.

Iha alegasaun finál, Ministériu Públiku husu ba Tribunál atu kondena arguidu ho pena prizaun fulan 6 no suspende ba tinan 1 ba arguidu tanba arguidu promete sei la repete tan ninia hahalok ne'e iha futuru.

Entretantu, Defeza husu ba Tribunál atu aplika pena traballu ba arguidu maibe sei Tribunál iha hanoin seluk bele aplika pena ne'ebé adekua no justu ba arguidu.

Depois avalia faktus sira durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

#### **10. Krime ofensa ba integridade fízika simples ho natureza violénsia doméstika**

Nú. Prosesu : 148/PEN/16/TDS  
Kompozisaun Tribunál : Singulár  
Juis : Dr Samuel da Costa  
Ministériu Públiku : Dr. Matias Soares  
Defeza : Dr. Gaspar Pereira Gusmão (advogadu privadu)  
Tipu desizaun : Pena prizaun fulan 6 suspende ba tinan 1

Iha 21 Jullu 2016, Tribunál Distritál Suai prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu YK hasoru nia feen, iha Distritu Bobonaro.

Ministériu Públiku akuza katak, iha 09 Fevereiru 2016, arguidu tuku lezada dala 2 iha nia liman kabun, dala 1 iha tilun hun no basa dala 4 iha hasan loos. Aktu hirak ne'e rezulta lezada sofre moras iha kabun, hasan no bubu iha lezada tilun-hun.

Ministériu Públiku akuza, arguidu kontra artigu 145 KP kona-ba ofensa ba integridade fízika simples konjuga ho artigu 2, 3 no 35 (b) LKVD.

Iha prosesu julgamentu, arguidu konfesa totalmente ba faktus iha akuzasaun no deklara katak, nia komete duni krime hasoru nia feen. Mesmu nune'e, arguidu deklara katak nia arrepende ona ninia hahalok no husu ona diskulpa ba lezada. Aleinde ne'e, lezada kontinua reforsa akuzasaun Ministériu Públiku no deklara katak nia perdua ona arguidu.

Iha alegasaun finál, Ministériu Públiku husu ba Tribunál atu kondena arguidu ho pena prizaun tinan 1 no suspende ba tinan 1 fulan 6. Aleinde ne'e, Defeza husu ba Tribunál atu aplika pena suspensaun ba arguidu tanba arguidu konfesa faktus, arrepende ba ninia hahalok no hetan ona perdua hosi lezada.

Depoisde rona tiha parte sira hotu no avalia faktu sira ne'ebé iha ligasaun Tribunál konklui no kondena arguidu ho pena prizaun fulan 6 suspende ba tinan 1.

#### **11. Krime ofensa ba integridade fízika simples ho natureza violénsia doméstika**

Nú. Prosesu : 75/PEN/16/TDS  
Kompozisaun Tribunál : Singulár  
Juis : Dr Nasson Sarmento  
Ministériu Públiku : Dr. Bartolomeo de Araujo  
Defeza : Dr. Gaspar Pereira Gusmão (advogadu privadu)  
Tipu desizaun : Pena multa US\$240.00.-



Iha 21 Jullu 2016, Tribunál Distritál Suai prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu FML hasoru nia feen, iha Distritu Bobonaro.

Ministériu Públiku akuza katak iha 28 Novembru 2016, arguidu tuku lezada dala 2 iha lezada nia matan fukun no ibun, rezulta moras no bubu iha lezada nia matan fukun no ibun.

Ministériu Públiku akuza, arguidu kontra artigu 145 KP kona-ba ofensa ba integridade fízika simples konjuga ho artigu 2, 3 no 35 (b) LKVD.

Iha prosesu julgamentu, arguidu konfesa totalmente ba faktus iha akuzasaun no rekoñese ninia salan no deklara katak, aktus ne'ebé nia komete hasoru lezada hanesan aktus espontáneadu. Aleinde ne'e, lezada kontinua reforsa akuzasaun Ministériu Públiku no deklara katak, nia perdua ona arguidu.

Iha alegasaun final, Ministériu Públiku husu ba Tribunál atu kondena arguidu ho pena prizaun tinan 1. Nune'e mós, Defeza husu ba Tribunál atu aplika pena suspensaun ba arguidu tanba arguidu konfesa faktus no arrepende ona ba ninia salan.

Depoide avalia faktus hotu, Tribunál konklui no kondena arguidu ho pena multa US\$240.00 ne'ebé kada loron sei selu US\$2.00 durante loron 120. Wainhira arguidu lakumpri sei hetan kastigu loron 40 iha prizaun, inklui selu kustu judisiál US\$25.00.-

## **12. Krime ofensa ba integridade fízika simples**

Nú. Prosesu	: 119/PEN/16/TDS
Kompozisaun Tribunál	: Singulár
Juis	: Dr. Benjamin Barros
Ministériu Públiku	: Dr. Bartolomeo de Araujo
Defeza	: Dr. Gaspar Fereira Gusmão (advogadu privadu)
Tipu desizaun	: Pena multa US\$60.00.-

Iha 22 Jullu 2016, Tribunál Distritál Suai prezide leitura sentensa ba krime ofensa ba integridade fízika simples ne'ebé envolve arguidu SM hasoru lezadu JML, iha Distritu Covalima.

Ministériu Públiku akuza katak, iha 09 Agostu 2015, arguidu trata no toluk lezadu ho liafuan karallu no lori nia liman karuk hanehan ba lezadu nia kanuruk, tuku dala 1 iha lezadu nia kanuruk no lori au-rohan maran kiik baku tan dala 1 iha kanuruk. Aktu ne'e rezulta lezada sofre moras no bubu iha kanuruk.

Ministériu Públiku akuza, arguidu kontra artigu 145 KP kona-ba ofensa ba integridade fízika simples ne'ebé nia moldura penál entre tinan 3 ka multa.

Iha prosesu julgamentu, arguidu konfesa totalmente ba faktus iha akuzasaun no deklara nia arrepende ona ba ninia hahalok no husu ona diskulpa ba lezadu. Enkuantu lezadu kontinua reforsa akuzasaun Ministériu Públiku no deklara katak, nia perdua ona arguidu.

Iha alegasaun finál, Ministériu Públiku husu ba Tribunál atu kondena arguidu ho pena prizaun fulan 3 suspende ba tinan 1. Defeza husu ba Tribunál atu aplika pena ne'ebé justu no kmaan ba arguidu, tanba arguidu rasik konfesa faktus no arrepente ona nia hahalok liu hosi prosesu husu diskulpa ba lezadu no lezadu rasik konfirma perdua ona arguidu.

Depoide avalia faktu sira, Tribunál konklui no kondena arguidu ho pena multa US\$60.00 no kada loron, sei selu US\$1.00. Wainhira lakumpri pena refere sei hetan kastigu loron 40 iha prizaun.

### **13. Krime la halo tuir obrigasaun alimentár**

Nú. Prosesu	: 240/PEN/16/TDS
Kompozisaun Tribunál	: Singular
Juis	: Dr. Benjamin Barros
Ministériu Públiku	: Dr. Bartolomeo de Araujo
Defeza	: Dr. Gaspar Fereira Gusmão (Advogadu privadu)
Tipu desizaun	: Omologa dezisténsia keixa

Iha 22 Jullu 2016, Tribunál Distritál Suai prezide prosesu konsiliaun ba krime la halo tuir obrigasaun alimentár ne'ebé envolve arguidu JdRA hasoru lezada LcL, iha Distritu Bobonaro.

Iha prosesu konsiliaun ne'e, lezada husu atu deziste keixa tanba arguidu prontu atu fo osan US\$40.00 kada fulan ba nia eis feen nia konta bankaria nune'e bele sustenta mós nia oan sira, tanba ne'e lezada aseita no fó perdua ba arguidu.

Antes ne'e, Ministériu Públiku akuza katak, iha 24 Dezembru 2015, arguidu ho lezada diskute malu tanba diskonfia arguidu iha relasaun amante ho fetu seluk. Depoide ne'e arguidu sai hosi uma durante fulan 6, la kumpri nia obrigasaun atu fó alimentasaun ba nia feen ho nia oan nain 1, ne'ebé sei ho idade menor 1.

Ministériu Públiku akuza, arguidu kontra artigu 225 KP kona-ba la halo tuir obrigasaun alimentár. Iha alegasaun finál Ministériu Públiku no Defeza husu ba Tribunál atu omologa prosesu refere.

Bazeia ba akordu hosi parte rua no dezisténsia keixa hosi lezada, Tribunál konklui no omologa akordu dame ne'e.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)